



Toni Monn-Derungs, Sedrun

19.11.1925 - 20.04.2003

Pastgas, ils 20 d'avrel gest suenter messa da fiasta vegnин nus confruntai cun la tresta nuviala dalla mort anetga da Toni Monn-Derungs. Malgrad sia cuorta maldispostadada ina frida memia anetga ch'ins vul buca acceptar igl emprem mument. Pér tier la sepultura, gie cunzun ussa sent'ins ch'il Toni maunca. Quei maletg cugl um avon la garascha spel burer da lenna ei svanius. Ins mira adumbatten.

Toni Monn ei naschius ils 19 da november 1925 a Surrein sco fegl da Gion Antoni Monn e Barla Catrina, naschida Curschellas. Ensemen cun 5 frars

e 4 soras passenta el ina biala affonza el ravugl dalla gronda famiglia. Sco usitau frequenta el las scolas ordinarias en Tujetsch. Suenter in onn sco pastur dad alp serenda el per 2 onns a Zug sco fumegl. Finida la scola da recrut entscheiva Toni 1946 igl emprendissadi da spazzatgamin a Lucerna. Ver 10 onns lavura el ussa sin quei mistregn en differents loghens giu la Bassa. Igli onn 1957 retuorna il curaschus giuven puspei ella patria. Las ovras pils implorts d'energia havevan gest entschiet e purtau laver ella Val. Aschia sedecidan Toni e siu frar Benedetg d'acquistar in camiun per far transports. L'idea ei gartegiada e la firmetta da transports Monn crescha e prosperescha. Duront quei temps eregian els era communablamein la casa cun garascha. Ils davos onns avon sia pensiun s'engascha Toni Monn era sco nurser e pastur en la val.

Igli onn 1969 marida Toni culla giuvna Onna Derungs ord la Lumnezia. Els survegnan 3 affons che portan bia legria en famiglia. Cunzun ils beadis ein stai pil defunct in plascher special ed ein era vegni tractai dil tat leusuenter. Il Toni ei staus per la famiglia sco era per ils vischins in um da bien cor cun la devisa da viver e schar viver. Entuorn il Toni stevan ins tgunsch muort sia aviartadad e bien humor. Era sch'e possedeva principis nunballuchivevels savevan ins sevolver tier el cun mintga problem e malgrad ch'e fuva in um da fuolas prendeva el peda per vischins e jasters e fageva era bugen survetschs. Numerusas gadas eis el segidaus cun vischins tier ina laver ni l'autra.

Era ellas uniuns era el beinvesius sco premurau commember. Toni ei staus in bien catschadur e cunzun in versau cavacrappa. Cheu tedlav'ins ordvart bugen il Toni raquintond dad episodas ni latin ver ni inventau sco quei ch'igl ei usit tier catschadurs etc. Sco cavacrappa hael empriu d'enconuscher igl aug e padrin sco gagliard e versau amitg dalla natira. Era sch'el mava scols camutschs enconuscheva el il prighel ed untgeva nua ch'ei fageva da basegns. El ha appreziav e gudiu las bellezias da nos cuolms tochen alla fin. Ils davos onns ha Toni trafficau bia cun lenna egl uaul ni avon casa. Las duas materias crappa e lenna ha el appreziav e tschentau sco fundament per sia lavur e hob.

Ensemens cun sia dunna sin via viers la baselgia per serender a messa da Pastgas ha Toni bandunau nus tut nunspitgadamein. El lai anavos ina brava largia cunzun en famiglia, mo era tier parents ed enconuschents. En num da tuts ditgel a Ti engrazia per ils bials temps passentai ensemens e per il bien demussau. Lein tener il Toni en buna memoria cun sia fatscha rienta sco sin il maletg sura. El ruaussi en pasch!